

Na osnovu člana 25. alineja deseta Statuta Spoljnotrgovinske komore Bosne i Hercegovine – prečišćeni tekst („Sl. glasnik BiH“ br. 52/14), člana 4. stav (7) i člana 5. stav (9) Pravilnika o usklađivanju i registraciji međunarodnih i međuentitetskih autobuskih redova vožnje („Sl. glasnik BiH“ br. 77/14), Upravni odbor Spoljnotrgovinske komore BiH, na sjednici održanoj telefonski dana 21.10.2014. godine, donio je

## **O D L U K U**

### **O NAČINU OBAVLJANJA POSLOVA USKLAĐIVANJA MEĐUNARODNIH I MEĐUENTITETSKIH AUTOBUSKIH REDOVA VOŽNJE**

#### **Član 1.**

##### **(predmet)**

Ovom odlukom bliže se uređuje organizacija postupka sprovođenja stručnih i administrativnih poslova koji se odnose na prvostepeni postupak usklađivanja međunarodnih i međuentitetskih autobuskih redova vožnje, u skladu sa Pravilnikom o usklađivanju i registraciji međunarodnih i međuentitetskih autobuskih redova vožnje („Sl. glasnik BiH“ broj 77/14) (u daljem tekstu: Pravilnik), uz poštivanje normi upravnog postupanja.

#### **Član 2.**

##### **(postupak podnošenja zahtjeva)**

- (1) Zahtjev za usklađivanje reda vožnje se podnosi Spoljnotrgovinskoj komori BiH (u daljem tekstu: Komora) u skladu sa članom 4. stav 1. ili članom 5. stav 1. Pravilnika, isključivo u zatvorenoj koverti i na obrascu propisanom članom 7. stav 1. Pravilnika.
- (2) Uz zahtjev prevoznik dostavlja dokaz o uplati naknade koja se plaća Komori na ime njenih troškova postupka.
- (3) Zahtjev se Komori podnosi putem pošte preporučeno, ili se predaje neposredno na protokolu Komore.

#### **Član 3.**

##### **(objava)**

- (1) Zahtjevi koji su u Komori zaprimljeni do kraja radnog vremena poslednjeg radnog dana u mjesecu, Komora komisijski otvara prvog radnog dana u narednom mjesecu.

- (2) Istoga dana kada su i otvoreni svi uredno podneseni zahtjevi iz stava (1) ovog člana, Komora objavljuje na službenoj web stranici ([www.komorabih.ba](http://www.komorabih.ba)) njima pripadajuće prijedloge redova vožnje, radi provođenja postupka usklađivanja.
- (3) Smatraće se da je zahtjev uredan ukoliko su ispunjeni sljedeći uslovi:
  - a) da su zahtjev i prijedlog reda vožnje dostavljeni u zatvorenoj koverti,
  - b) da su zahtjev i prijedlog reda vožnje dostavljeni na propisanom obrascu iz Priloga 1. Pravilnika,
  - c) da je dostavljen dokaz o izvršenoj uplati propisane naknade troškova postupka.
- (4) Ukoliko nisu ispunjeni svi uslovi iz stava (3) ovog člana, prijedlog reda vožnje neće biti objavljen.
- (5) Prevozniku čiji prijedlog reda vožnje nije objavljen zbog jednog od razloga iz stava 3. ovog člana, Komora vrši povrat naknade na ime troškova postupka ukoliko je ista uplaćena.

#### **Član 4.**

##### **(pravo prigovaranja)**

- (1) Prevoznik ima pravo prigovora na objavljeni red vožnje.
- (2) Prigovor se podnosi Komori u roku od 15 dana od dana objavljivanja reda vožnje na propisanom obrascu koji je u prilogu ove odluke i čini njen sastavni dio.

#### **Član 5.**

##### **(sadržaj prigovora na objavljeni međunarodni red vožnje)**

- (1) Prigovor na objavljeni međunarodni red vožnje se može podnijeti u pogledu usklađenosti njegovih minimalnih vremena s registriranim redom vožnje za koji podnosilac prigovora posjeduje važeću dozvolu ili posjeduju važeće rješenje o proglašenju reda vožnje usklađenim.
- (2) Prigovor će se razmatrati ukoliko su uz njega dostavljeni:
  - a) ovjerena kopija važeće dozvole i registriranog reda vožnje i dokaz o uplati naknade u postupku prigovaranja ili
  - b) kopija važećeg rješenja o proglašenju reda vožnje usklađenim i dokaz o uplati naknade u postupku prigovaranja.

## **Član 6.**

### **(sadržaj prigovora na objavljeni međuentitetski red vožnje)**

- (1) Prigovor na objavljeni međuentitetski red vožnje se može podnijeti u pogledu usklađenosti njegovih minimalnih vremena s registriranim redom vožnje za koji podnosilac prigovora posjeduje važeće rješenje Ministarstva komunikacija i transporta BiH (u daljem tekstu: Ministarstvo) ili posjeduje važeće rješenje o proglašenju reda vožnje usklađenim.
- (2) Prigovor će se razmatrati ukoliko su uz njega dostavljeni:
  - a. ovjerena kopija važećeg rješenja Ministarstva, ovjerenu kopiju registrovanog reda vožnje i dokaz o uplati naknade u postupku prigovaranja, ili
  - b. kopija važećeg rješenja o proglašenju reda vožnje usklađenim i dokaz o uplati naknade u postupku prigovaranja.

## **Član 7.**

### **(postupak usklađivanja)**

U postupku usklađivanja reda vožnje Komora utvrđuje ispunjenost uslova propisanih Pravilnikom i ovom odlukom.

## **Član 8.**

### **(ispunjenost uslova)**

- (1) Za međuentitetski red vožnje koji ispunjava uslove propisane Pravilnikom i ovom odlukom, a za koji u predviđenom roku nije izjavljen opravdan prigovor, potrebna je prethodna saglasnost nadležnog organa za usklađivanje redova vožnji entiteta, odnosno Brčko distrikt BiH.
- (2) Zahtjev za saglasnost nadležnim organima iz prethodnog stava podnosi Komora najkasnije u roku od 30 dana od dana objave zahtjeva za usklađivanje reda vožnje na web stranici.
- (3) Za red vožnje za koji nije data saglasnost iz prethodnog stava u propisanom roku, Komora donosi rješenje o neusklađenosti istog.
- (4) Izuzetno, ukoliko se na prijedlogu međuentitetskog reda vožnje za dio linije koji prolazi kroz entitet, odnosno Brčko distrikt BiH, nalazi samo jedna stanica, nije potrebna prethodna saglasnost nadležnog organa za usklađivanje redova vožnji tog entiteta, odnosno Brčko distrikta BiH.

## **Član 9.**

### **(rješenje o usklađenosti)**

- (1) Za međunarodni i međuentitetski red vožnje koji ispunjava uslove propisane Pravilnikom i ovom odlukom Komora rješenjem proglašava red vožnje usklađenim.
- (2) Sastavni dio rješenja je red vožnje koji je usklađen i ovjeren od strane Komore.

## **Član 10.**

### **(rješenje o neusklađenosti)**

- (1) Predloženi međunarodni ili međuentitetski red vožnje koji u bilo kom svom dijelu ne ispunjava uslove propisane Pravilnikom i ovom odlukom, Komora rješenjem proglašava neusklađenim.
- (2) Predloženi međuentitetski red vožnje za koji je potrebna prethodna saglasnost nadležnog organa za usklađivanje redova vožnji entiteta, odnosno Brčko distrikt BiH, a ista nije data u propisanom roku, Komora rješenjem proglašava neusklađenim.
- (3) Sastavni dio rješenja je predloženi red vožnje.

## **Član 11.**

### **(dostavljanje rješenja)**

- (1) Rješenje se dostavlja podnosiocu zahtjeva za usklađivanje reda vožnje.
- (2) Kopija Rješenja se dostavlja i prijevoznicima koji su podnijeli prigovor na predloženi red vožnje.

## **Član 12.**

### **(žalba na rješenje)**

- (1) Prevoznici iz člana 11. ove odluke mogu izjaviti žalbu Ministarstvu, putem Komore.

## **Član 13.**

### **(registar usklađenih redova vožnji)**

- (1) Komora vodi Registar rješenja za redove vožnji koji su proglašeni usklađenim.
- (2) Registar je javan i vodi se u elektronskom obliku na službenoj web stranici Komore.
- (3) Registar obavezno sadrži sledeće podatke:
  - a. o podnosiocu zahtjeva,
  - b. o usklađenom redu vožnje i
  - c. o statusu rješenja u pogledu dana izdavanja i roka važenja.

#### **Član 14.**

##### **(saradnja)**

U realizaciji poslova propisanih ovom odlukom Komora saraduje sa Ministarstvom, nadležnim organima za usklađivanje entitetskih redova vožnje entiteta, odnosno Distrikta Brčko BiH, te drugim organima i institucijama u skladu sa njihovim nadležnostima.

#### **Član 15.**

##### **(organizacija Komore)**

- (1) Poslovi vezani za realizaciju ove odluke obavljaju se u Upravi stručnih poslova Komore.
- (2) Komisiju iz člana 3. stav 1. ove odluke imenuje Upravni odbor.
- (3) Generalni sekretar Komore obezbjeđuje materijalne, kadrovske i druge pretpostavke za realizaciju ove odluke i odgovoran je za njeno zakonito i efikasno provođenje.

#### **Član 16.**

##### **(Prelazne i završne odredbe)**

- (1) Zahtjevi podneseni nakon stupanja na snagu Pravilnika rješavaće se u skladu sa odredbama Pravilnika i ove odluke, a prvo otvaranje podnesenih zahtjeva izvršiće se dana 01.12.2014.godine.
- (2) Zahtjevi podneseni prije stupanja na snagu Pravilnika rješavaće se u skladu sa odredbama Pravilnika i ove odluke.

#### **Član 17.**

##### **(stupanje na snagu)**

Ova odluka stupa na snagu danom donošenja.

Broj:01-2-1611-4/14

Sarajevo:21.10.2014. godine

**PREDSJEDNIK**

**UPRAVNOG ODBORA**

**Mario Hrkać**

